

職方典第八百四十卷

和州部彙考二

和州風俗考

州志

本府

史記楚越之地飯稻羹魚不待賈而足地勢饒食無饑饉之患以故些窳偷生無聚積而多貧
隋書地理志歷陽人性躁勁風氣果決自平陳之後俗頗尚淳質好儉約

劉禹錫廳壁記女工尚堅全男工尚翬闢市無侈眩工無雕彩無遊人異物以遷其志

舊志明初爲畿內首善之地大化所被四民各安其業而儒雅之風尤甚非復曩時比

黃志云文德武功後先相望忠材節義世亦有人士敦禮教畏清議庸庶安居樂業不侈宮
室鞍馬不惑風水婚嫁不論財 婚禮男家遣媒妁通言然後納禮名曰定禮及期納禮名

曰娶禮親迎之日以兄弟送女歸閭或以伯叔代之猶有六禮遺意 喪禮殯斂多用布服

不尚金銀器飾棺尙杉木不用槨葬則墳而不墓取實築爲堅亦多以礮灰築者歲久灰結堅

如石崇佛修齋儒者之家多不用今亦往往有之

祭禮多祭於堂寢而無家廟四時以二

至及中元除夕生忌日祭之餘或因事以祭不可類舉清明及十月墓祭並祀后土食物必薦新或稀異珍貴者初得一薦之親友以盛品相饋者亦薦

閨風婦女非至親不輕見亦不

畫出出必以輜徒行必在昏暮以弟姪嫗婢擁送男女相遇必異道女子戒習字文

正月

立春前一日迎春東郊各門採傳奇已事肖人肖像齊集關聖廟前名曰演春遠近童叟競觀爲樂散春花春枝田家擊長秧鼓各官宴畢導入縣治前詰朝鞭春如制元旦男婦夙興盛服祀冢神畢視歲吉所向提火拜廟親友更相賀歲十三四夜爲試燈十五夜爲正燈家製元宵相餉十六夜婦女出遊曰走百病然亦尋常有之紳士家及稍有體者皆禁

二月三日爲

文昌帝君誕辰城中紳士斂貲以祝或祝於學或祝於宮八日喫凍食

三月三日簪薺菜

花清明插柳葉於門寢寢徑簪柳葉前後數日展墓家之子姓俱至族繁者合族人先祭於墓

後祭於祠祭畢飲福酒散兒童多放紙鳶二十三日天妃誕辰二十八日東嶽誕辰城市及邨

廟咸修禊以壽

四月朔日簪阜角菜八日供浮屠烏飯十六日晚以月占年

五月午

日姻親餽禮是日啖角黍供蒲艾貼道符飲雄黃酒小兒繫綵絲香絡於背塗雄黃於額耳以避時氣運漕水鄉亦往往有鬪龍舟者十三日城鄉俱祝關聖誕辰演劇誦經各聽所便月內多斂貲爲醮 六月六日曬衣入伏日多製六一散香薷飲以却暑 七月七日婦女穿

針乞巧中元以冥資羹酒祀祖先有喪之家親友各相餽送甥壻輩必親到孟蘭會亦間行之 八月中秋羅罇賞日用月餅菱角毛豆親友餽遺如天中節 九月重九炊糴餅薦先有逸

興者登高是日造酒

十一月冬至祀祖先前後數日展墓如清明節

十二月二十三

日以飴餅生茗祀竈神更具細草數莖豆少許曰爲竈神芻馬不及舉者俟之次日除日貼門神春聯封門紙夕則具牲醴庶羞祀祖先用白魚接竈家人置酒守歲簫鼓爆竹聲達旦先數日餽節

和州祠廟考

寺觀附

州志

本府

社稷壇在印山門外半里許

山川壇在梁山門外半里許

郡厲壇在香泉門外半里

許 賢母祠在周侯廟左祀周侯虎母何氏也 三賢祠祀唐太學生何蕃國子司業張

籍宋狀元張孝祥其祠舊在儒學東廡之側久廢知州康誥請祀于古和書院未幾復改建于
學門之南卽今菩提橋巷左也 三老堂在州治後祀宋知州傅堯俞范純仁劉摯也按舊

志元祐間孫真建規制久廢明正德丙子知州黃公標重建 土地祠在州治儀門外歲以

除夕致祭 烈女祠在城南隅舊在城西明嘉靖二年同知薛祖學改建祀宋烈女徐氏元

孝婦劉氏明節婦張氏董氏尹氏張氏包氏清氏耿氏汪氏陳氏王氏楊氏張氏崔氏周氏王
氏湯氏劉氏春秋致祭 香烈祠在州治之西北明崇禎乙亥流寇陷城知州黎弘基及同

知陳得姚學正康正諫教諭趙世選慷慨殉難紳士庶民婦女死者十餘萬或憤勇罵賊或焚
溺自盡捐軀雖異其節則無異也賊退巡按梁雲構親臨和城仰刺史之忠痛郡人之禍設壇
而哭者三日復爲祠以祀之額之曰香烈取其節烈足以馨香千古也春秋二仲月致祭

浣紗女祠在馬神廟之右卽古漁丘渡也今居人名爲土地廟而移其像于土地神之側

焦澹園祠在州治西北隅今香烈祠旁內有立雪堂 陸秀夫祠在豐山地方 鄭良嶽

祠在張家山學者過守耕羅應選等共建迎江浦鄭良嶽講學于此因祠祀焉 城隍廟在

州治東南創始未詳明洪武元年封承天鑒國司民靈護王 周侯廟卽忠烈廟在姬家巷

東舊在橫江門內宋開禧三年秋和州軍民感郡侯周虎全城之功爲立生祠淳祐七年賜廟

額忠烈 關帝廟在元妙觀東祀漢壽亭侯關公舊雖朔日行香而祀典不與

皇清順治十七年知州楊繼芳乃定制春秋二仲月繼丁後一日致祭 霸王廟在城東北四十

里烏江祀項羽輿地要覽云宋紹興辛巳金主亮渝盟來乞箋神不從欲焚廟俄大蛇出屋梁

又聞林木中鼓噪若數千兵至亮大驚散去元至元壬午縣令不蘭奚重請於朝爲本州祀典

春秋致祭 馬神廟在百福寺後明嘉靖元年知州楊天茂改淫祠爲之祀司馬之神歲用

有司致祭 姥廟在州西三十里麻湖之陽祀歷陽之神母也 灌將軍廟在印山門內

城下漢時灌嬰修和州城有功故廟祀守城無功故不從祀也 九娘子廟舊在州治內祀

歷陽侯范增女也宋慶曆初東寇王倫圍歷陽于堞南角恍若有見已而潰散遂就勦滅追封

威顯夫人紹興元年詔歷陽威顯夫人增昭廟金字今廢 余闕廟舊在城西隅今失其處

秦姬廟在州西三十里麻湖之陰昔秦始皇爲東南遊浮于湖徵民婦女牽舟舟大不可動誅者甚衆有姬泣諫不聽投湖中死始皇憐姬之死罷其役民感其德立廟祀之 插花廟在

州東北七十里陰陵山之陽廟祀魯妃卽項王之虞姬也禱輒有應方春男女奔走于廟或報或祈皆插花以識之故土人以名其廟 高廟在州南四十里舊傳爲公輸子手造其廟高

聳規制亦異昔紅巾賊欲焚之大蛇出賊懼止今重修 龍王宮在州南六十里梁山鎮

東嶽廟在州治東南隅順治丙申年郡人馬如融建 關王廟在大南門外山川壇之東郡

人大理寺左評事葉積學建

含山縣

社稷壇在縣西郊 風雲雷雨山川壇在縣南郊 邑厲壇在縣北郊 功臣祠在縣

東街祀明華高仇成李彬楊文紀清 烈女祠在縣南街祀張子文妻尹氏唐恕妻楊氏胡

崇仁妻周氏吳自高妻申氏王慰妻胡氏張堦妻王氏王自謙妻慶氏 游定夫祠在縣登

科橋祀廣平游先生酢也初知縣胡漢建祠于學宮北明嘉靖元年鄭慶遷于縣東二里和含

舊大路之側後改路河濱知縣陳一善復遷于登科橋

馬神祠在縣治儀門外東 土

地祠在縣幕廳東

三烈祠在運漕鎮西岡康熙二十三年建祀烈婦余氏夫死以餓殉夫

者也鮑孀姑許烈婦附故名余氏夫婦墓卽在祠後

城隍廟在崇儒坊

旌忠廟爲宋

統制姚興立舊立廟戰所賜額旌忠土人禍福有禱輒應今立廟在縣東九都

五顯廟一

在南街一在銅城閘鎮

關帝廟舊在寶臺觀後明萬曆丁未年移置東門外登科橋鎮合

邑水口

都司廟一在南二都石門山外一在祁首岡南一在關門鎮

二郎廟一在南

二都二郎街一在魯橋西南

晏公廟在縣東門外一里岡上有靈十江湖明封平浪侯

東嶽廟一在縣南門外一在龍角橋一在運漕鎮一在十一都

龍王廟一在蒼山一在銅

城閘一在縣河南廢久今重建

大聖廟在東九都遠近祈子者禱之多應

三官廟一

在學宮西一在銅城閘鎮

袁三廟在大朴樹鎮

八角廟在五都

崔府君廟在銅

城閘按神乃唐朝崔珏

寺觀附

本州

百福寺在州城中唐貞觀二年建初有五寺因名以五華寺一曰文殊二曰泗州三曰淨土四曰彌勒五曰百福元末俱燬于兵吳元年僧法珪重建爲百福寺明嘉靖甲午改遷以學爲寺後萬曆二十九年復遷寺于故址卽今處原有僧正司在殿東乙亥燬于寇 延慶寺去城

西九里在長壽鄉十一都宋熙寧三年建用以守彭中丞墳祠元末廢明永樂間僧智敏復修乾明寺在州東南二里乘駟橋東其西卽宋學舊址也東有廣惠宮碑漣漫不可讀 觀音

寺在城外三十里姥下鎮旁燬於元明永樂六年僧善稠重修 梵行寺在州南五十里

貞觀五年鐵腳僧恩建有古塔 清福寺在州南二十里後晉開運四年建 極樂寺在

州南四十里唐元和年建 開化寺在州南六十里宋元祐三年建 香延寺在州南七

十里白望市之東唐貞觀三年建 黃山寺在州南七十里 妙巖寺在州南九十里裕

溪之北唐元和年建 普明寺在州東南六十里天門山後元至正二年建 石佛寺在

州南十五里 泉水寺在州東北七十里寺有泉甚奇唐貞觀五年建 莊嚴寺在州西

二十五里舊名臨佛寺宋太平興國中徙苦竹村故又名苦竹寺久傾圯僧慧鎬重修有海棠

洞罩春亭

知果寺在州西四十里

甘露寺在州東北二十里元至正三年建

華

嚴寺在州東北三十里宋咸淳二年建左右山麓蜿蜒

廣勝寺在州東北四十里烏江鎮

旁唐貞觀三年志靜僧建

赭樂寺在州北五十里以土少赤故名宋嘉定十年建

香

社寺在州北四十里以寺旁香泉故名宋建隆三年建有塔有昭明書院寺後有二松極奇後

忽枯惜哉

大乘寺在州北三十里

六墳寺在州北六十里如方山下相傳有僧六世

修道此山有六墳在焉故名明洪武三年重修二十四年歸併

孔夫寺在州北六十里許

孔夫山下明洪武十五年重修二十四年歸併成化間改建

馬鞍普明寺在州北五十里

馬鞍山中元至正五年建明洪武六年重修二十四年歸併寺原有松最大

石漸寺在西

北六十里

三塔庵在州西五里以圖阜三尖如塔故名

施宮庵在州西北四十里山

上有泉盤曲下流可灌二三里

智果庵卽其寺之分派居也州西三十里

孔雀庵在

州北五十里其山曾出一禽鄉人先擬鳳凰名鳳凰庵又擬孔雀更擬山形似孔雀故名

生生庵在鍼魚嘴會中士民建以居僧專主拯溺等事

觀勝庵在州北四十里

海會

庵在烏江香泉之間法師妙有始建

虎堂庵在州西三十里麻湖旁明洪武二年建

陸冢庵爲宋大學士文忠公秀夫立後改僧舍以奉香火

廣生生庵在梁山鎮每值風雨

晦冥恐有行舟覆溺令主僧召集水手飛舸往救

淨樂庵在州西桃花塢萬曆丙辰年建

興隆庵在州西四十里嵐龍山之麓

白雲庵在香泉西舊爲支龍庵久廢鐵山禪師重建

深隱庵在州西四十里古刹久廢明崇禎丙子諸生張燮父張應舉重建

宿雲庵在嵐龍

山頂明崇禎年僧慈水始建

圓通庵在脉天山前僧九會建

石淨庵在州西五里古

爲水府廟後改今名

法華庵在州北四十里明天啟元年僧宗和浚井得銅伽藍像係宋

徽宗四年造因募資重建

仁和庵在福臨廟左明萬曆四十六年建

竹林庵在州西

南四十五里郡人葉敬中建

元妙觀在州治西南關廟之右宋熙寧六年冲素道人建舊

名天慶觀元至元中改今名

元真宮在州治南譙樓正北奉祀真武建於宋

皇清康熙十四年於拱辰門東南隅卜地一區改建焉規模弘敞兩殿俱崇遂爲後之勝蹟

淳

熙觀在州南四十里葛仙翁嘗煉丹于此有八卦池迨宋太祖駕幸此誕生太子又名爲壽寧

宮 紫極觀在州南五十里舊在桃花塢旁元兵火廢道人李溶川遷於高廟西南塔山下

龍興觀在州北五十里如方山麓 棲雲觀在州西南三十里卽棗林觀

含山縣

安國寺舊在城外西南隅唐貞觀僧澄禪師建元末廢于兵明洪武十五年僧會興進重建遷南門內僧會司在焉嘉靖間知縣葉繼善遷東門後仍其舊 褒山寺山以唐貞觀惠褒禪

師得名宋元豐後黃魯直王介甫王深甫皆有文字塔上寶塔二字猶傳張安國書年號特誤明初寺建自永樂中鄭和使西域還也殿堂制度甚工絕無蛛絲鼠跡云有辟塵珠所致然不知所在藏經箱小而古蠹不敢蝕云有異香所塗先住持世守更有玉杵鐵杖金磬錦袍玻璃盤旛檀座等物或侵或毀無復遺者 雲閣寺在縣北三十里唐貞觀三年鐵船祖師建

正覺寺在運漕鎮唐貞觀二年金禪師建 普明寺宋元豐二年僧無用建 淨戒寺在

縣南七十里唐貞觀二年僧密禪師建有彭祖煉丹井并仙室在焉 大善寺在縣南唐貞

觀三年鐵船祖師建

佛慧寺在縣西三十五里元至正二年僧德遜建

興教寺在東

關之嶺唐貞觀二年鐵船祖師建有關公飲馬池卓刀泉

永興寺在十四都有陳村湯泉

齊林寺在十五都

城山寺在昭關

三塔寺在十四都

圓通寺在南二都

華

陽寺在十四都洞在寺前後

佛會寺在十五都

邑堂寺在十五都

圓照寺在北

二都

明山寺在大都明山

觀音庵在縣南二十里元至正五年僧慈德建

雲霧

庵在八分山古柏新篁極其幽勝時有白雲往來禪室故名

蒼山庵

清涼庵

接

引庵二庵俱與雲霧蒼山相鄰其庵雲影翳翳松林鬱鬱地甚幽僻爲太湖山一帶勝景

白衣庵在安國寺後市民徐世靖倡建

觀音閣在銅城關右街明萬曆三十年鎮民程應

明等倡建

法輪庵邑令周創

寶峯庵在十五都

金斗庵在十五都

梅山庵

在北二都梅山

土山庵在太湖山下明萬曆年僧玉庵募建

華嚴庵在東七都僧悟

心募建

水浮庵在運漕東河下

準提庵一在學宮東一在運漕正覺寺後一在運漕

鎮東一在大聖寺後

龍華庵在八角廟後

寶臺觀在東街宋張知觀建

長真觀

在白石山卽彭祖仙屋一名白石觀今廢

麟川觀在縣南六十里久廢相傳其地出麟故

名 天妃宮在縣治東隅康熙四年重建

三元宮在運漕鎮

和州驛遞考

通志

本州

設馬七匹草料銀二百一兩六錢馬夫四名工食銀四十三兩二錢差夫十名工食銀一百八兩買馬鞍轡等銀七十三兩五錢扣存帶閤銀一十一兩七錢六分歲支銀共四百三十八兩六分

含山縣

設馬七匹草料銀二百一兩六錢馬夫四名工食銀四十三兩二錢差夫十名工食銀一百八兩買馬鞍轡等銀七十三兩五錢扣存帶閤銀一十一兩七錢六分歲支銀共四百三十八兩六分

和州兵制考

通志

本州

梁山營州有八鎮梁山其一也貢山面江民居不下二千餘家舊設江防州同分駐地形險要扼金陵上遊康熙二年造營壘分遊兵營遊擊千把總官率兵汛守其地卽以操江舊署拓而新之爲將領駐居建造營房安插兵衆 東門新設營房梁鎮旣造營房設兵防守督院兼諭分兵州城各派城守以千總一員督率擇東門小教場并造公署營房安插官兵康熙十年間奉文更調守備一員添兵汛防將千總撤回知州夏瑋復爲建署造房坐落東門城東隅轅門柵欄儀門三間大堂三間內宅二層 演武場在州城東南二里方六百步中有廳周圍有堦有木前有坊表匾曰養威蓄銳萬曆年重修至

皇清康熙十二年州守夏瑋捐資復修

牛屯河巡檢司江面五十里上至張家溝下至新河口

煙墩五座舊每座墩夫三名巡掠弓兵四十五名明隆慶六年議增八名巡船一隻哨船二隻萬曆二年置烏銃四管至

皇清議裁牛屯巡司弓兵止留十二名

裕溪河鎮巡檢司江面三十里上至新溝口下至張家

灣煙墩一座墩夫三名巡掠弓兵原額并議增共三十六名巡船一隻哨船一隻萬曆二年置鳥銃四管至

皇清議裁裕溪弓兵止存九名

浮沙口巡檢司江面四十里上至新河口下至馬河煙墩五

座舊每座墩夫三名巡掠弓兵四十五名明隆慶六年議增八名巡船一隻哨船一隻萬曆二年置鳥銃四管至

皇清裁浮沙巡檢併牛屯兼管其弓兵止存九名

梁山防駐官兵康熙二年總督部院郎查照

和州西梁山乃沿江北岸險要之地雖有遊兵營派防而寥寥數人無官駐守應將省會之遊兵營遊擊并帶千把總官移駐梁山防守沿江一帶地方而本營原議有馬兵則和州一州陸路并所屬含山縣地方自應責令管轄等因具題奉

旨依議續經總督郎廬州道孫檄州該知州楊繼芳詳請于康熙二年撥兵派守六門城內建造營署兵房令千總督率到州安插又撥千總帶兵駐防含山至康熙十年間奉文將千總撤回梁山更調守備一員赴州汛防其遊擊帶領官兵駐劄西梁山以司地方以衛城池弭盜安民事

關至鉅遇銀鞘則謹巡護送遇警急則偵探防守

含山縣

僻處山隅舊無兵守近經總督部院議分梁山鎮百總四員一督兵派守四門一駐運漕鎮一駐銅城關一駐再安鎮各處起蓋營房安插康熙二十二年改設把總一員鎮守縣城三鎮官兵悉如舊 演武場在縣西三里方四百步中有廳周圍有垣前有坊表萬曆年重建

和州物產考

通志

雜屬

麻泉州通產有白麻黃麻苧麻諸種

半夏州通產一名守田生於夏半前後

牡丹含

山產其種有水紅千葉重臺開列如錦

天鵝州產洲渚間大者至十餘斤

鹿州通產

麋州通產陶弘景云海陵間最多千百爲羣多牝少牡

狐州通產

煤炭州通產

和州古蹟考

墳墓附

州縣志合載

本州